

1. oktober 2013

UKA 2013/17
Kristian Jeremiassen

Uunga siunnersuut: Meeqqanut inatsisip Kalaallit Nunaanni meeqqat inatsisitigut inissisimanerat pillugu inatsit nr. 197, 16. juuni 1962-imeersoq naapertorlugu allannguutissap atuutilernissaanut aalajangiiffigisassatut siunnersuut kiisalu inatsit nr. 154, 27. maaji 1964-imeersoq Kalaallit Nunaanni kingornussisarnermut tunngasoq pillugu Inatsisartunut aalajangiiffigisassatut siunnersuut.

(Naalakkersuisut Siulittaasuat aamma Nunanut allanut tunngasunut Naalakkersuisoq)

Siullermeerneqarnera.

Siumumiit Meeqqanut inatsisip Kalaallit Nunaanni meeqqat inatsisitigut inissisimanerat pillugu inatsit nr. 197, 16. juuni 1962-imeersoq naapertorlugu allannguutissap atuutilernissaanut aalajangiiffigisassatut siunnersuut kiisalu inatsit nr. 154, 27. maaji 1964-imeersoq Kalaallit Nunaanni kingornussisarnermut tunngasoq imatut oqaaseqarfingissavagut:

Meeqqat aappariinnerup avataatigut inunngortut Kalaallit Nunaanni Danmarkimiluunniit inunngornertik apeqqutaatinnagu inatsisitigut tunngaviatigut assigiimmik inissisimapput. Kalaallilli meerartaat immikkoortut marluk inatsisitigut allatut inissisimapput, tassami ataatamik kinaassusiata aalajangertinnissaanut periarfissaqannginnamik. Pineqartut tassaapput Kalaallit Nunaanni meeqqat Kalaallit Nunaanni meeqqat pillugit inatsisip atortuulernerana sioqqullugu inunngorsimasut Inatsisissatut siunnersuummi pingaarnertut siunertarineqarpoq "meeqqat inatsisilerinikkut ataataqanngitsut" inatsisilerinikkut inissisimanerat pitsaanerulersinneqassasoq meeqqat taakkua ataatamik kinaanera pillugu eqqartuussivimmut suliassanngortitsisinnaalersillugit. Tamannalu suliaq qularnaatsumik Siumumiit aaqqinneqassasoq pingaartutut isigivarput isumaqarattami taamatut inissisimatitsineq inuttut pisinnaati-taaffimmik malinninnerunngittoq.

Kalaallit meerartaasa ataatamik kinaassusiata aaliangertinnissaanut periarfissaqarsimannginneq tassaasimavoq danskinik naqisimaneqarnerup takussutissartaa, tamannalu inuiattut inuiaqatingiinni annertuumik tarnikkut nanertuutaasimavoq ilungersunartoq anernartorlu oqaluttuarisaanitsinni atajuartusaaq, inunnimmi eqquisimavoq kinguaariinnut anniaataasimalluni.

Kalaallit Nunaanni kingornussisarneq pillugu inatsit atuuttoq malillugu meeraq meeqqat inatsisitigut inissisimanerat pillugu inatsisip atulinngikkallarnerani inuusimasut ataataminnit inatsit malillugit kingornussisussaataangillat maannakkullu Siunnersuutip siunertaa

tassaasoq meeqqat inatsisitigut inissisimanagerat naapertorlugu malittarisassat nalinginnaasut malillugit meeqqat ilaqutaanagerat aalajangerneqarsimappat taava meeqqat ilaqutaasut allat assigalugit kingornussisussaataalernissaat taamatut siunnersuuteqarneq Siumumiit ajoriffissaqartinngilarput tamakkiisumillu taperserlugu.

Kingornussisinnaanermut suliat naammassereersimasut kinguneqartippaat meeqqat pineqartut kingornussinngittoornerannik, tamannali Siumumiit naammagiinnarniannngilarput piomasaraarpullu Naalakkersuisut qallunaat Naalakkersuisuinut meeqqat pineqartut taarsiivigineqarnissannik piomasaqarnissamut, meeqqat pillaatissiarissanngimmassuk inatsisitigut periarfissinneqarsimannginnertik.

Siumumiit taamatut oqaaseqarluta Siunnersuutit saqqummiunneqartut tamakkiisumik taperserlugit aappassaaneerneqannginnerani Inatsisartut Inatsiseqarnermut Ataatsimiititaliaani suliareqqitassanngorlungu ingerlateqqipparput.